

समे – 12:25

<><><><><>

Uttarakhand Helicopter Crash

उत्तराखंड च अज्ज बडलै केदारनाथ इलाके दे गौरीकुंड खरक दे पहाड़ी इलाके च इक इक हैलीकाप्टर दुर्घटनाग्रस्त होई गेआ। जेह्दे च सब्बने 7एं लोकें दी मौत होई गई ऐ। इनें 7एं लोकें च 6 तीर्थयात्रु ते इक पायलट बी शामिल ऐ। हैलीकाप्टर केदारनाथ थमां गुप्तकाशी जाने आले रस्ते च हा। इस घटना दी जानकारी मिलदे गै बचाह् टीमें गी इस थाहरे पर भेजी दित्ता गेआ ते राहत ते बचाह् अभियान शुरू कीता गेआ। एसडीआरएफ नै दस्सेआ जे दुर्घटनाग्रस्त हैलीकाप्टर पूरी चाल्ली फकोई गेआ ते सब्बने लोकें गी बरामद करी लैता गेआ ऐ। इस दुखद हादसे पर एतराखंड दे मुख्यमंत्री पुष्कर सिंह धामी होरें डूहंगा दुख जाहर कीता ऐ।

<><><><><>श

Tourist Destinations

उपराज्यपाल मनोज सिन्हा होरें 22 अप्रैल गी पहलगाम आतंकी हमले दे परेंत आरजी तौरा पर बंद कीती गेदियां सैलसफा आली किश थाहरे गी 17 जून थमां समूलचे जम्मू कश्मीर च चरणबद्ध तरीके कन्नै परतियै खोलने दी घोषणा कीती ऐ। फिलहाल 16 थाहरे गी सैलानिएं आस्तै खोलेआ जा'रदा ऐ, जेह्दे च जम्मू ते कश्मीर संभागें च 8-8 थाहरां शामिल न। कश्मीर च परतियै खुलने आली थाहरे च बेताब घाटी, वेरीनाग, कोकरनाग ते अच्छाबल गार्डनस शामिल न, जिसलै के जम्मू खित्ते च कठुआ जिले च सरथल ते डग्गर, रियासी च देवीपिंडी, सियाड़ बाबा ते सुला पार्क, डोडा च गुलडंडा ते जाई घाटी ते उधमपुर च पंचैरी गी बी इस शुरूआती गेड़ दे दरान परतियै खोली दित्ता जाग।

<><><><><>श

DGP Bhagwati Nagar

डीजीपी नलिन प्रभात होरें औने आली श्री अमरनाथ जी दी यात्रा लेई सुरक्षा प्रबंधें दी समीक्षा करने लेई जम्मू दे भगवती नगर बेस कैप दा दौरा लाया। उनें सीआरपीएफ, पुलस ते खुफिया मैहकमे दे अधिकारिएं कन्नै इक उच्च स्तरीय बैठक दी अध्यक्षता कीती, जिनें उनेंगी

सुरक्षा उपाएं बारे जानकारी दित्ती। डीजीपी होरें इस कैप दा निरीचण बी कीता ते सुरक्षाबलें बश्कार तालमेल दी सराहना बी कीती। 38 दिन चलने आली एह यात्रा पहलगाम ते बालटाल थमां चलग ते पैहला जत्था श्रागवती नगर थमां रवाना होग। उआं गै डीआईजी उधमपुर-रियासी सराहा रिजवी होरें बी इक बैठक लाई, जेह्दे च मॉक ड्रिल, तालमेल ते पूरी तैआरी उप्पर जोर दित्ता गोआ।

<><><><><><>श

JK State Tax

कर चोरी उप्पर इक बड़्डी कारवाई करदे होई जम्मू कश्मीर राज्य कर मैह्कमे नै पूरे जम्मू संभाग च इक्कै बेल्ले च तपाशी ते जब्त अभियान चलाया। इस ड्राइव च फर्जी चलान ट्रेडिंग, धोखाधड़ी आले ई-वेबिल ते बोगस इनपुट टैक्स क्रेडिट क्लेम गी नशाना बनाया गोआ ऐ। कमीशनर स्टेट टैक्स जम्मू कश्मीर श्री पी.के.भट्ट हुंदी अगुवाई ते अडिशनल कमीशनर नम्रता डोगरा हुंदी निगरानी च 13 प्रवर्तन टीमें रिकार्ड ते स्टॉक गी वैरीफाईड कीता। जेह्दे कन्नै मती चीजें दा पर्दाफाश कीता गोआ। कमीशनर होरें आखेआ जे इस अभियान दा मकसद लोक राजस्व दी रक्षा ते निशपक्ष कर-प्रघाएं गी जकीनी बनाना ऐ।

<><><><><><>श

Employment Mela

स्वरोजगार ते उद्यमिता गी बढ़ावा देने लेई जिला रोजगार ते परामर्श केन्द्र नै जिला प्रशासन उधमपुर कन्नै रलियै कल मिशन युवा तैह्त्त इक दिने दे उद्यमिता-सह-जागरूकता मेले दा आयोजन कीता। इस कार्यक्रम दा मकसद मकामी युवाएं गी सरकारी प्रायोजित उद्यमिता कार्यक्रमें दी तलाश लेई प्रेरित करना ऐ। बड़ी मती गिनतरी च युवाएं ते मकामी लोकें इस कार्यक्रम च हिस्सा लैता। इस मौके उप्पर बोलदे होई डिप्टी कमीशनर उधमपुर सलोनी राय होरें युवाएं गी सशक्त बनाने लेई प्रशासन दी प्रतिबद्धता उप्पर लोह पाई।

<><><><><><>श

PTC Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेह्दी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी

सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी जम्मू पंजीतीर्थी च अज्ज संजा 6 बजे कोला पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>श

आकाशवाणी जम्मू दा क्षेत्रीय समाचार, एकांश अंतर्राष्ट्रीय योग दिवस पर 20 मिंटे दा इक खास कार्यक्रम पेश करा करदा ऐ। जेहदा प्रसारण 18 जून गी बडलै 7 बज्जियै 10 मिंट पर कीता जाग। कार्यक्रम च साढ़ियां परौहनियां होंगन मन्नी परमन्नी दियां योग आचार्य डॉ. सुजाता संथु। सुजाता होर साढ़े जीवन च योग दे महत्व बारे अपने बचार सांझे करगंन। चर्चा दी मेजबानी साढ़े न्यूज एंकर श्रुति खजूरिया ते कुणाल श्रीवत्स करगंन। एह कार्यक्रम तुस मीडियम वेव 303 मीटर यानि 990 किलोहर्टज ते एफएम 100.3 मेगाहर्टस पर सुनी सकदे ओ।

<><><><><><>श